



Caderno da crítica

Cuestionario Proust: David Cortizo

[Ramón Nicolás 2 Xaneiro 2015](#)

1.– Principal trazo do seu carácter?

-Supoño que sentido do humor. Son, tamén, bastante tranquilo.

2.– Que calidade aprecia máis nas persoas?

-Se cadra o mesmo, sentido do humor, e tamén sinceridade. No entanto, esta última nas doses xustas.

3.– Que agarda das súas amizades?

-Que se lembren de min cando precisen axuda.

4.– A súa principal eiva?

-Son despistado, lacazán e desleixado mais fago o posíbel para que ninguén se decate.

5.– A súa ocupación favorita?

-Ler (e falar).

6.– O seu ideal de felicidade?

-Vivir sen preocupacións.

7.– Cal sería a súa maior desgraza?

-Ser o responsábel desa desgraza.

8.– Que lle gustaría ser?

-O que son (e quen son) agora mesmo está bastante ben.

9.– En que país desexaría vivir?

-Nunha Galiza dona da súa soberanía (e onde os galegos saiban o que son e non o que lles din que son).

10.– A súa cor favorita?

-Seica é o verde (esa me asignan as miñas fillas).

11. – A flor que máis lle gusta?

-A que medra libre no campo.

12.– O paxaro que prefire?

-O que voa ceibe no ceo.

13.– A súa devoción na prosa?

-Hai moito onde escoller, pero por dicir só un e achegarme ao termo devoción: Agustín Fernández Paz.

14.– E na poesía?

-Non son moito de poesía. No entanto, o colega Paco Macías recomendoume hai un tempo ler a Rosalía Fernández Rial e acho que con moi bo criterio.

15.- Un libro?

-*Crime e castigo*.

16.– Un heroe de ficción?

-Usagi Yojimbo, o coello samurai da BD de Stan Sakai.

17.– Unha heroína?

-Nausicaä, a princesa do Val do Vento do filme de Hayao Miyazaki.

18.– A súa música favorita?

-Case que todas as variantes do metal son do meu gusto, especialmente o Rap Metal de Rage Against the Machine.

19.– Na pintura?

-Ultimamente gosto moito do traballo de Leandro Lamas.

20.– Un heroe ou heroína na vida real?

-Calquera que sacrifique parte da súa felicidade en favor da dos demais.

21.– O seu nome favorito?

-Adoito gustar dos nomes en función da xente que aprecio, se tivera que dicir algún diría Lucía e Marta.

22.– Que hábito alleo non soporta?

-A prepotencia.

23.– O que máis odia?

-O abuso de poder.

24.– A figura histórica que máis despreza?

-Medrei sentindo noxo por Manuel Fraga, mais acho que non é nin figura nin histórica.

25.– Un feito militar que admire?

-Penso que ningún feito militar é digno de ser admirado.

26.– Que don natural lle gustaría ter?

-Ter unha saúde de ferro estaría ben.

27.– De que maneira lle gustaría morrer?

-Nun filme de Hayao Miyazaki, rodeado dos meus, despois de dar a miña vida por un mundo mellor.

28.– Cal é o seu estado de ánimo máis habitual?

-Adoito estar sempre de bo humor.

29.– Que defectos lle inspiran máis indulxencia?

-Non adoito fixarme nos defectos dos demais (se acaso podo axudar a corrixilos).

30.– Un lema na súa vida?

-Non son moito de lemas e frases feitas. Porén, xunto a unhas amizades, coñecín uns Lema en Vimianzo (no día de defuntos) que, cando penso neles, vénseme á cabeza a frase “vive e deixa vivir”.